

Pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut ilaasortaq, Anna Wangenheim, Demokraatit)

Akissuteqaat

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik)

Siullermeerneqarnera

Inatsisartunut ilaasortap, Anna Wangenheimip, Demokraatit, Kalaallit Nunaanni sullivinnik avatangiisit pillugit annertuumik soqutiginninneranut Naalakkersuisut qujassuteqarput.

Naalakkersuisut eqqumaffigeqquvaat, sullivinnik avatangiisit pillugit ilinniartitaaneq suli danskinit oqartussaaffigineqarmat. Suliarli pillugu Naalakkersuisut misissuipput, aamma Kalaallit Nunaanni Sullivinnik Nakkutilliisoqarfik paasissutissanik pissarsiffigalugu.

Sullivinnik Nakkutilliisoqarfiup Kalaallit Nunaanni sullivinnik avatangiisit pillugit ilinniartitaaneq inatsisitigut pisussaaffiusoq inatsisit malillugit neqeroorutigisarpa. Pikkorissaanerit aallaaviatigut nuna tamakkerlugu ingerlanneqartarput, ullullu suliffiusut tallimat ataqatigiit peqataaffigineqartumik ingerlanneqartarlutik. Pikkorissaanerit kalaallisut danskisullu ingerlanneqartarput. Pikkorissaanerit neqeroorutaasut amerlanertigut ulikkaaqqasarput.

Sullivinnik avatangiisit pillugit ilinniartitaanermi tiguneqartut 2022-mi 198-iupput, 2023-mi 235-ullutik, aamma piffissami 1. januar 2024-miit 25. september 2024-mut 203-ullutik. Ukiup sinneranut pikkorissaanerit neqeroorutigineqartut suli tallimat ingerlanneqanngillat, tamarmillu ingerlanneqarnissaat naatsorsuutaavoq. Pikkorissaanerit ulloq 25. september 2024-mi peqataaniarlutik nalunaartut katillugit 80-iupput.

Tassa 2023-mi pikkorissaanerit 13-it neqeroorutigineqarput, aqqaneq-marlullu ingerlanneqarlutik, kingulleq ataaseq pikkorissartussat amigaataanerit pissutaalluni taamaatinneqarluni. 2024-mi pikkorissaanerit 17-it neqeroorutigineqarput amerlanerpaanik 20-nik peqataasinarsinnaasut, tassa pikkorissaanerit tamarmik ingerlanneqarpata, peqataasut 340-t, anguneqassallutik. Pikkorissaaneq nalunaaquttat akunnerinik 37-inik sivissuseqartoq 6.400 kr-inik akeqarpoq.

Sullivinnik Nakkutilliisoqarfiup ilisimatitsissutigaa, sulilerlaat tamaasa ilinniartitaanermut peqataasarnissaat aningaasaqarnikkut annertuumik nammakkiissasoq. Aamma ilisimatitsissutigineqarpoq, Sullivinnik Nakkutilliisoqarfik ilinniartitaanerit taama amerlatigisut piginnaasaqarfiginngikkai.

Taamaattumik naatsorsuutigineqarsinnaavoq, Sullivinnik Nakkutilliisoqarfimmut attuumassuteqanngitsumik neqeroorutigineqartumik nutaamik sullivinnik avatangiisit pillugit

ilinniartitaanermik pilersitsisoqarnissaanik isummertoqassasoq, assersuutigalugu Danmarkimi takuneqarsinnaasoq. Naggataani Sullivinnik Nakkutilliisoqarfiup ilisimatitsissutigaa, siunnersuut piviusumik atortinneqarsinnaanera ajornakusuussasoq naatsorsuutigalugu.

Kalaallit Nunaanni sullivinnik avatangiisit pillugit inatsisip nutarsarneqarnera Inatsisartut 2022-mi ukiakkut ataatsimiinnerminni akuerivaat, ilaatigut isumannaallisaaneq peqqinnissarlu pillugit suliffeqarfiup suleqatigineqarnera nutarsarneqarluni sunniuteqarluarnerulersillugulu. Naalakkersuisut isumaqarput, sullivinnik avatangiisit pillugit inatsisip nutarsarneqarnerata sulisussat iluarisimaarinnittuunissaannut naammassisaqarnerunissaanullu pilersitsiniarnermik ukkatarinnitsitsilertoq, taamaalillutik sulisartut naleqartut isumannaatsutullu misigisimalersillugit.

Suliniutit pitsaasut ingerlareersullu saniatigut Naalakkersuisut, sammisat soorlu sulinermi atugassarititat pitsaannerusut oqallisigineqarnissaat siunertaralugu, suliffeqarnermi politikki ataatsimoortoq pillugu qinikkanik kattuffinnillu oqaloqatigiinnissap aallarnisarnissaa pillugu pilersaaruteqarput. Taamaattumik Naalakkersuisut allannguutissatut siunnersuummik inassuteqarput:

“Naalakkersuisut siunissamut sammisumik qanoq suliaqarnissamut pilersaarusiorniarlutik 2025-mi suliffeqarneq pillugu isumasioqatigiinnermi sammisaaq sullivinnik avatangiisit oqallisigineqarnissaanik Naalakkersuisut peqquneqassasut.”

Taamaatut oqaaseqarlutik Naalakkersuisut allannguutissamik siunnersuutaat akuersissutigineqassasoq inassutigaa.